



Vischnaunca
Tujetsch

Protocol dalla 14. radunonza da vischnaunca

dils 25 da mars 2026

allas 19.00 en Sala Cristalla a Sedrun

**Protocol nr. 14 dalla radunonza da vischnaunca dils 25 da mars 2026
allas 19.00 entochen allas 21.17
ella Sala Cristalla a Sedrun**

Presidi: Martin Cavegn (president communal)

Protocollista: Simona Giossi (menadra administraziun)

Dumbravuschs: Silvio Schmid e Maurin Cavegn

Presents: 25

Perstgisas: Reto Schmid

Tractandas:

1. Beinvegni e constataziuns
2. Protocols dalla radunonza da vischnaunca nr. 12 dils 29 d'october 2025 e nr. 13 dils 12 da november 2025
3. Approbaziun dalla revisiun parziala dalla lescha davart igl encurir cristallas e minerals ed il lavar aur
4. Approbaziun d'in credit pil project da revaletaziun dalla cuntrada da paliu ella Val Maighels
5. Approbaziun d'in credit supplementar pertuccont la sanaziun dalla canalisaziun Valtgeva
6. Approbaziun d'in credit d'investiziun per l'adattaziun dalla loipa a Zarcuns
7. Orientaziuns
8. Varia

Tractanda 1 Beinvegni e constataziuns

Il president communal fa in cordial beinvegni a tuttas convischinas e tuts convischins sco era als dus commembers dalla cumissiun da gestiun tier la 14-avla radunonza da vischnaunca dil trienni 2023-2026.

En connex cul tragic accident mortal dils 20 da mars 2026 supplichescha il president tut ils presents da star en pei e da seregurdar en ruaus dall'unfrenda.

Tractanda 2 Approbaziun dils protocols dalla radunonza da vischnaunca nr. 12 dils 29 d'october 2025 e nr. 13 dils 12 da november 2025

Suenter ch'il protocol nr. 12 dils 29 d'october 2025 ei vegnius publicaus en nies fegl official La Tuatschina nr. 23 dils 21 da november 2025 ed il protocol nr. 13 dils 12 da november 2025 ella Tuatschina nr. 25 dils 19 da december 2025, ein neginas protestas vegnidas inoltradas el decuors da 30 dis dapi la publicaziun. Ils protocols ein cheutras approbai.

Tractanda 3 Approbaziun dalla revisiun parziale dalla lescha davart igl encurir cristallas e minerals ed il lavar aur

Il president communal declara daco che la suprastonza communal ei sedecidida da reveder parzialmein la lescha davart igl encurir cristallas e minerals ed il lavar aur. In motiv ei che las damondas da sgular cun helicopter per transportar rauba han priu tier ils davos onns e che la suprastonza lessi evitar in turissem da helicopter els cuolms. Plinavon propona la suprastonza che mo pli cavacrappa che han il domicil civil en Vischnaunca Tujetsch astgien schluppentar e far diever da maschinas da furar. Per burgheis da Tujetsch vala quei buca pli. Medemamein ei la patenta annuala per burgheis dalla vischnaunca vegnida sliada si. Mo pli cavacrappa cul domicil civil en vischnaunca retscheivan ina patenta pli bienmarcada. Era la patenta annuala per burgheis dil Grischun e per Svizzers domiciliai el cantun ei vegnida strieda. Talas persunas pagan naven d'ussa il medem prezi sco tut ils ulteriurs Svizzers ni persunas digl exterior domiciliadas en Svizra.

Il motiv ei che las persunas che pagan taglia ella vischnaunca duein haver in avantatg. Vinavon ha il president communal explicau ch'ei hagi dau ina seduta culla suprastonza dall'Uniun Cristal Tujetsch. L'uniun ha exprimiu lur giavischs pertuccont il tener uorden, ils depots da material sco era davart il schurmetg dil fuorn. Els han fatg la proposta ch'ils uaffens duein vegnir marcai cun ina colur specifica mintgamai per dus onns. Questa colur vegn definida dall'administraziun communal. Uaffens ch'ei marcai cun ina colur ch'ei pli veglia che dus onns, astgan vegnir allontanai ed il fuorn ei puspei libers per explotar. Il medem vala pils depots da material.

Leutier vegn ch'il cavacrappa ei obligaus da communicar all'administraziun communal il num e las coordinatas dils depots. Il motiv per introducir e francar quella nova pratica ella lescha ei da tener uorden e da schurmegiar la natira. Il president communal accentuescha che buc il cavacrappa indigen seigi il problem, mobein igl jester che vegni e laschi anavos in disuorden.

Debatta d'entrada:

Ella debatta d'entrada ein siat persunas exprimidas tier art. 9 "Sgols cun helicopter". Ei ha dau ina damonda schebein ei seigi buca discriminont da dar a certas persunas dapli dretgs che ad autras. Il president communal explichescha che quei seigi vegniu sclariu giuridicamein e seigi buc il cass. Ina persuna che seigi domiciliada ella vischnaunca hagi in auter sensori dad ir entuorn cugl ambient ed el center stetti il schurmetg dalla natira. Las damondas inoltradas per sgular vegnien il bia da persunas ch'ei buca sesentas a Tujetsch. Aschia vegnien ins da reducir sgols e quei seigi egl interess dalla natira e digl ambient.

Plinavon ei vegniu dumandau sch'ei seigi era scumandau da sgular sch'in cavacrappa buca domiciliau en Tujetsch anflì in fuorn extraordinari e stoppi schar sgular giuadora las cristallas explotadas. Il president communal declara che la suprastanza communal dess en quei cass ina lubientscha extraordinaria.

Pliras persunas ein s'exprimidas en connex cul plaid "persunas" ch'ei screts egl artechel 9. Ei seigi buca clar da tgei persunas ch'ins tschontschì. In convischin ha declarau che la lescha pertuchi il cavar crappa ed aschia basegni ei buc exnum d'ina pli clara explicaziun dil plaid "persunas", cunquei ch'ei sappi mo settractar da cavacrappa. Il president communal fa attents che helicopters astgien en general buca sgular persunas ch'ei vegni fatg transports da material.

Tier art. 12 "Schurmetg dil fuorn" ei vegniu tschentau la damonda sch'ei seigi giavischau ch'ins preni in vapurisader (Spraydose) per dar color ils uaffens. Il president communal propona che l'uniun duei haver endamen ensemen tgei che mondi il meglier per colurar ils uaffens. Davart l'administraziun communal vegni ei buca dau avon co ils uaffens duein vegnir colorai.

Il president communal fa attents ch'ei vegni semtgau in fegl d'informaziun che vegni tarmess ni surdaus tier mintga cumpra dalla patenta, aschia che tuts seigien informai davart las novas midadas.

Tier art. 13 "Tener uorden e depot da material" ei vegniu dumandau tgi che hagi envesta ellas datas e coordinatas dils depots. Il president declara che sulettamein l'administraziun communal hagi envesta e che lezza detti secapescha ora neginas informaziuns.

L'adressa e las coordinatas seigien necessarias per haver ina survesta e per saver adossar ils cuosts dalla dismessa en cass ch'in depot seigi pli vegls che dus onns.

Igl ei vegniu tschentau la damonda tgi che seigi responsabels per rumir depots bandunai. Il president declara che quei seigi la lavur dalla vischnaunca, denton seigi lezza visada vi sillas informaziuns dils cavacrappa. Ei basegni ina collaboraziun, aschia ch'ins sappi tgei depots ch'ins astgi allontanar.

Il president communal declara vinavon che la directiva tier la lescha mondi en vigur pér naven dils 1 da zercladur 2026 e buca gia ils 1 d'avrel 2026 sco la lescha e sco quei ch'ei seigi vegniu orientau el messadi. La raschun persuerter seigi che las biaras patentas vegnien vendidas naven dil mars entochen matg. Duront quei temps capitass igl alzament e quei seigi buca ideal e vilentass ils cumpraders.

In participont dalla radunonza menziunescha ch'el quetti igl alzament giustifiaus. Dapi 25 onns seigien las taxas buca pli vegnidas alzadas.

Benedetg Hendry fa la proposta da midar la successiun dils plaids egl art. 9: Sgols cun helicopter en connex cun l'explotaziun da cristallas astgan sulettamein vegnir incaricai da personas cun domicil en vischnaunca e cun ina patentà valeivla.

Votaziun

La radunonza da vischnaunca ha approbau la revisiun parziala dalla lescha davart igl encurir cristallas e minerals ed il lavar aur cun midar la construcziun en artechel 9 "Sgols cun helicopter" suandontamein: *Sgols cun helicopter en connex cun l'explotaziun da cristallas astgan sulettamein vegnir incaricai da personas cun domicil en Vischnaunca e cun ina patentà valeivla.*

Tractanda 4 Approbaziun d'in credit pil project da revaletaziun dalla cuntrada da paliu ella Val Maighels

Il president communal declara la muntada naziunala dalla cuntrada da paliu ella Val Maighels. Quella cuntrada ei suttamessa al pli ault schurmetg e quei sin scalem naziunal. Il punct decisiv seigi stau l'abdicaziun dils contract da sittar cull'Armasuisse entras la decisiun dil cussegl da vischnaunca. Sinaquei hagi la vischnaunca incaricau Ervin Monn, ensemen cugl Uffeci per la natira ed igl ambient (UNA), da lantschar in project da revaletaziun. Duront pliras sesidas da contractivas cugl UNA, l'Armasuisse e la suprastanza communal da Tujetsch hagien ins saviu

argumentar che l'armada stoppi pagar per metter en uorden ils donns ch'els havevan caschunau antruras (Versursacherprinzip). Igl UNA e l'armada han pretendiu che la vischnaunca stoppi medemamein separticipar cun ina summa. Resumau ha l'Armasuisse gia pagau frs. 458'000.00 sin in conto e l'UNA vegn a pagar frs. 41'500.00, aschia che la vischnaunca hagi aunc da pagar ils cuosts restants da frs. 119'000.00. La suprastanza communal hagi investiu bia uras per recaltgar quels daners ed il davos seigi ei reussiu ed ei mondi la finala pil bien dalla natira.

Il gerau dil departament da baghegiar, forestalessen ed ambient declara ch'ils daners dalla vischnaunca vegnien investì per metter en uorden la Via da Maighels. Tala vegni fatga pli stretga en entgins loghens, tgei che caschuni pli paucs cuosts da manteniment el futur.

Debatta d'entrada:

In convischin fa attents che la vischnaunca duei exnum mirar cul cantun ch'els survegnien dabien ils puncts da recumpensaziun ni silmeins ina confirmaziun a scret. Medemamein pretenda in auter convischin che la suprastanza communal empermetti da survegnir questa confirmaziun.

Il president communal declara ch'el sappi buc empermetter ch'il cantun detti quels puncts, denton fetschi la suprastanza tuttas stentas per retscheiver ina confirmaziun a scret e pren encunter quella incarica.

Igl ei vegniu exprimiu che frs. 5.00 per carrar en Maighels seigi bia memia bienmarcau.

Il president declara che la Via da Maighels mondi tenor la lescha sut *via d'uaul* e leu seigi la taxa per tuttas vias definida sin frs. 5.00. La suprastanza communal vegni a tractar in alzament aschi spert sco pusseivel ed informar il pievel davart la decisiun.

Votaziun

La radunonza da vischnaunca ha approbau unanimamein il credit en summa da frs. 120'000.00 pil project da revaletaziun dalla cuntrada da paliu ella Val Maighels. Cun surdar l'incarica alla suprastanza communal da sclarir sch'ei detti puncts da recumpensaziun.

Tractanda 5 Approbaziun d'in credit d'investiziun per l'adattaziun dalla loipa a Zarcuns

Il gerau dil departament baghegiar, forestalessen ed ambient declara la situaziun. Cunquei che la stalla enta Zarcuns seigi vegnida engrondida, stoppi la loipa vegnir spustada sin in tschancun da rodund 40 m ella plaunca. La loipa stoppi vegnir spustada en in valletta che seigi pulit teissa e spundiva. Igl inschignier hagi recumandau da luvrar cun petgas da fier, ancras e mirs da

crappa nua che gliez fetschi basegns. El medem connex vegnien las buoras da lenn remplazzadas e gl'entir tschancun dalla loipa mess en uorden. La ladezia dalla loipa resti tuttina.

Debatta d'entrada:

Negina debatta d'entrada ei giavischada.

Votaziun

La radunonza da vischnaunca ha approbau unanimamein il credit d'investiziun en summa da frs. 115'000.00 per l'adattaziun dalla loipa a Zarcuns.

Tractanda 6 Approbaziun d'in credit supplementar pertuccont la sanaziun dalla canalisaziun Valtgeva

Il gerau dil departament baghegiar, forestalessen ed ambient declara la situaziun: La canalisaziun denter l'Ustria Valtgeva e la Via Valtgeva secattava en in fetg schliet stan e caschunava bia malemperneivladads cun quei ch'ella aveva memia pauc pendenza ed era rutta. Aschia ei in remplazzament staus inevitabels. En connex cul remplazzament d'ina tala lingia vegn gest era separau l'aua tschuffa e l'aua da meteo.

L'Aua Cristalla hagi priu la caschun d'adattar il conduct principal dil reservuar Salins, il qual traverseschi sutterranein ils binaris dalla Viafier Matterhorn Gotthard. Quei seigi en general buc ina situaziun ideala. La viafier vegli - en connex culla nova staziun - baghegiar ina rampa ed aschia seigi la lingia existenta aunc ina gada pli fetg enta peis. Quei savevan ins secapescha buc avon 15 onns. Per evitar la situaziun, ch'ins savessi el futur buca pinar la lingia sch'ella meini sut la rampa, seigi vegniu ponderau in'otra sligiazion. La lingia duei vegnir messa en via cun quei ch'ina via seigi pli sempel da cavar si sch'ei fagessi basegns.

Avon duas jamnas seigi la MGB s'annunziada ed hagi menziunau ch'els veglien far lavurs da stabiliment tiel sutpassadi. Els veglien rinforzar il funs e las varts dil qual. Ei seigi stau tema da sbassar il sutpassadi, tgei che seigi denton buc ideal e cuosti enorm bia. Aschia seigi vegniu recumandau alla MGB da buca sbassar quei sutpassadi. La MGB hagi viu en la situaziun e mondi da quei anora che quei vegni buc a capitar. Priu il cass ch'ei vegnessi tuttina sbassau e maschinas da baghegiar stuessien ir tras il sutpassadi, dessi ei pusseivladads da sbassar ils vehichels. Entochen dacheu hagi quei adina funcziunau.

Debatta d'entrada:

Igl ei vegniu dumandau daco che l'Energia Alpina prenda buca la caschun e colligi vid la reit d'anergia. Il president communal declara che quei schai gi vid la capacita dalla reit d'anergia. Tenor il plan da colligiazion seigi ei aunc buca previu da colligiar da quella vart edificis culla reit d'anergia.

Medemamein ei vegniu tschentau la damonda cun cons cuosts ch'ei fussi da quintar tier in sbassament dil sutpassadi. Il gerau cumpetent schazegia ils cuosts sin frs. 700'000.00 ni dapli.

Votaziun

La radunonza da vischnaunca ha approbau unanimamein il credit posteriur en summa da frs. 236'000.00 en connex culla sanaziun dalla canalisaziun Valtgeva.

Tractanda 7 Orientaziuns

Senda tiel Lai da Tuma

Ils 21 da matg 2025 seigi in terment crap curdaus giu dallas Plauncas Cuflegl e la senda per viandar al Lai da Tuma hagi stuiu vegnir serrada per immediat. Ins sappi tschintschar da grond cletg che quei crap seigi curdaus la notg e buca duront il di. Ei basegni d'ina sligiazion aschi segira sco pusseivel per saver garantir pils rodond 40'000 viandonts duront ina stad ina segira ruta per arrivar al Lai da Tuma. La suprastonza communal hagi schau intercurir da rudien la situaziun da prighel. Tenor ils pareris seigi clar che la senda sappi buca vegnir utilisada entochen ch'ei seigi buca clar co ei mondi vinavon. Aschia fa la suprastonza communal la proposta da baghegiar ina nova senda che meina entuorn il perimeter da prighel.

Cura ch'ei seigi pusseivel e la neiv laschi tier, vegni ei baghegiu ina nova senda nua ch'ins sappi sviar il prighel. Ei seigi vegniu fatg menziun dalla tematica da segirar la senda cun reits da protecziun (*Auffangnetze*). Sin damonda hagi igl Uffeci d'uaul e da prighels dalla natira detg claramain ch'il cantun sappi buca dar ina tala lubientscha. Quei per dus motivs: In motiv seigi che questa cuntrada stetti medemamein sut in ault schurmetg ed il secund motiv ei ch'ei detti ina pusseivladad da sviar. La nova senda da viandar sco era l'alternativa provisorie pils bikes vegnien publicadas ella proxima Tuatschina.

In convischin damonda daco ch'ins hagi buca montau uras da pagar leu nua ch'ils biars autos vegnien parcai per arrivar alla senda da viandar. Il president declara che tuts parcadis sper la via cantunala, pia ellas storschas ni era si tier il parcadi dil baghetg si Surpalits (baghetg nua ch'ei vegneva sittau) vegnien tolerai dil cantun - era sch'il terren sper via seigi terren dalla vischnaunca. Sche la vischnaunca vegli far parcadis, vegnien quels lubi sut la cundiziun ch'ei vegni catramau 5 meters naven dalla via. Si Surpalits stuess la vischnaunca aunc baghegiar in'ulteriura strivla verda, tgei che caschunass aults cuosts. Plinavon s'audi gest il toc per entrar sin quei parcadi buc alla vischnaunca. Il cantun tolereschi la situaziun actuala e nus laschien

quei sco ei seigi. Per quei motiv sappien ins montar neginas uras, damai ch'ils parcadis seigien buc erigi sco pretendiu officialmein dil cantun.

Manteniment da vias e lavur la notg

Il gerau cumpetent fa attents ch'ei vegni fatg lavurs da manteniment sin differentas vias communalas. Ei stoppi vegnir quintau cun certs disturbis ed impediments. Denton vegni ei fatg tut il pusseivel per tener quei en pintga rama. Las lavurs entscheivien suenter Pastgas e cuozien entochen l'entschatta zercladur. Plinavon detti ei lavurs la notg tier la Via Valtgeva, cun quei ch'ei vegni fatg lavurs vid ils binaris. Era cheu vegn supplicau per capientscha.

Il gerau dil departament d'economia e turissem orientescha ch'il Bogn Sedrun seigi staus serraus entgins gliendisdis per quei che la Scola Lumnezia hagi dau cuors da senudar a lur affons. Quei seigi vegniu communicau ella Tuatschina, silla pagina d'internet dil bogn sco era sillas medias socialas. Il bogn resti plinavon serraus naven dils 4 da matg entochen ils 9 da zercladur 2026. Naven dils 19 entochen ils 25 d'avrel 2026 hagi ina gruppa affittau il bogn per porscher cuors da spindrament.

Il Lag da Claus hagi uonn puspei las medemas fittadras sco gl'onn vargau, numnadamein Donka Doncheva ed Irena Vavova. Ellas arvien l'ustria dil Lag da Claus naven dils 1 da matg 2026.

Plinavon ei Piotr Burba il niev fittader dalla Miula. El ei oriunds da Pologna ed ha studegiau psicologia d'economia. Silsuenter ha el habitau biars onns a Köln. El vegn a gestiunar la Miula, denton senza la pasternaria.

La geraua d'agricultura e sanadad informescha che l'alp dil Tgom vegni naven d'uonn affittada dil menaschi puril Venzin da Curaglia, vul dir da David Venzin.

La menadra dall'administraziun informescha davart ils datums dallas proximas radunonzas da vischnaunca che han liug ils 22 d'avrel 2026, ils 20 da matg 2026 ed ils 24 da zercladur 2026.

Il president communal fa attents che neginas propostas seigien entochen ussa vegnidas inoltradas pil post vacant da gerau. El fa igl appel als presents d'encurir ina gerau ni in gerau.

Tractanda 8 Varia

Sut varia tschenta in present la damonda co ei vesi ora cul resort a Dieni.

Il president declara ch'el seigi s'entupaus la fin digl onn 2025 cun Samih Sawiris e cun tuts responsabels dalla ASA. Samih Sawiris eri seperstgisaus ch'ei mondi aschi ditg e ch'el vegni el decuors dil mars ni avrel 2026 a Tujetsch per informar il pievel davart il resort. Sincerau a bocca ha el ch'els veglien entscheiver a baghegiar igl onn 2028. Il president communal spetga giu la fin dil meins e lu emprova el puspei da prender si contact cun Sawiris. El sappi buca mintga jamna contactar ils responsabels. Quei entschevess ad unfisar la glieud. Ei setracti d'ina situaziun nua che la vischnaunca hagi buc las cartas enta maun. La lubientscha da baghegiar seigi vegnida prolungida per dus onns, vul dir entochen il schaner 2028. La lubientscha seigi vegnida dada cun fetg bia cundiziuns, aschia ch'ei basegni dalla vart dalla ASA enorm bia lavur ordavon per sclarir tut e per saver entscheiver.

In present supplichescha ch'ils luvriers da vischnaunca fetschien uorden respectiv seghien il pastg silla parcella digl anteriur hotel Oberalp. Quei vesi ora mal e fetschi buc ina buna pareta. Il president communal sincerescha che quei vegni fatg.

Il president communal engrazia per la presenza, la participaziun e la confidanza. El siara la radunonza da vischnaunca allas 21.17 e giavischa in bien retuorn a casa.

Protocollista:
Simona Giossi

President communal:
Martin Cavegn